

中 | 华 | 国 | 学 | 文 | 库



# 史 记 三

〔汉〕司马迁 撰

中 华 书 局




中华书局出版



# 史记

中华书局



中华书局

中 | 华 | 国 | 学 | 文 | 库




# 史 记 三

〔汉〕司马迁 撰

〔宋〕裴 駉 集解

〔唐〕司马贞 索隐

〔唐〕张守节 正义



中 华 书 局

# 史记卷三十八

## 宋微子世家第八

微子开者，<sup>①</sup>殷帝乙之首子而帝纣之庶兄也。<sup>②</sup>纣既立，不明，淫乱于政，微子数谏，纣不听。及祖伊以周西伯昌之修德，灭阬国，<sup>③</sup>惧祸至，以告纣。纣曰：“我生不有命在天乎？是何能为！”于是微子度纣终不可谏，欲死之，及去，未能自决，乃问于太师、少师<sup>④</sup>曰：“殷不有治政，不治四方。<sup>⑤</sup>我祖遂陈于上，<sup>⑥</sup>纣沈湎于酒，妇人是用，乱败汤德于下。<sup>⑦</sup>殷既小大好草窃奸宄，<sup>⑧</sup>卿士师师非度，<sup>⑨</sup>皆有罪辜，乃无维获，<sup>⑩</sup>小民乃并兴，相为敌讎。<sup>⑪</sup>今殷其典丧！若涉水无津涯。<sup>⑫</sup>殷遂丧，越至于今。”<sup>⑬</sup>曰：“太师，少师，<sup>⑭</sup>我其发出往？<sup>⑮</sup>吾家保于丧？<sup>⑯</sup>今女无故告<sup>⑰</sup>予，颠跻，如之何其？”<sup>⑱</sup>太师若曰：“王子，天笃下菑亡殷国，<sup>⑲</sup>乃毋畏畏，不用老长。<sup>⑳</sup>今殷民乃陋淫神祇之祀。<sup>㉑</sup>今诚得治国，国治身死不恨。为死，终不得治，不如去。”遂亡。

①【集解】孔安国曰：“微，畿内国名。子，爵也。为紂卿士。”【索隐】

按：尚书微子之命篇云命微子启代殷后，今此名开者，避汉景帝讳也。

②【索隐】按：尚书亦以为殷王元子而是紂之兄。按：吕氏春秋云生微子时母犹为妾，及为妃而生紂。故微子为紂同母庶兄。

③【集解】徐广曰：“阮音者。”【索隐】阮音者，耆即黎也。邹诞本云“邕音黎”。孔安国云“黎在上党东北，即今之黎亭是也”。

④【集解】孔安国曰：“太师，三公，箕子也。少师，孤卿，比干也。”

⑤【集解】孔安国曰：“言殷不有治政四方之事，将必亡也。”

⑥【集解】马融曰：“我祖，汤也。”孔安国曰：“言汤遂其功，陈力于上世也。”

⑦【集解】马融曰：“下，下世也。”

⑧【集解】孔安国曰：“草野盗窃，又为奸宄于外内。”

⑨【集解】马融曰：“非但小人学为奸宄，卿士已下转相师效，为非法度。”

⑩【集解】郑玄曰：“获，得也。群臣皆有是罪，其爵禄又无常得之者。言屡相攻夺。”

⑪【集解】孔安国曰：“卿士既乱，而小民各起，共为敌讎。言不和同。”

⑫【集解】徐广曰：“一作‘陟水无舟航’，言危也。”駉谓典，国典也。

【索隐】尚书“典”作“沦”，篆字变易，其义亦殊。徐广曰“典，国典也”。丧音息浪反。

⑬【集解】马融曰：“越，于也。于是至矣，于今到矣。”

⑭【集解】马融曰：“重呼告之。”

⑮【集解】郑玄曰：“发，起也。紂祸败如此，我其起作出往也。”【索隐】往，尚书作“狂”，盖亦今文尚书意异耳。

⑯【集解】徐广曰：“一云‘于是家保’。”駉案：马融曰“卿大夫称家”。

⑰【集解】王肃曰：“无意告我也，是微子求教诲也。”

⑱【集解】马融曰：“躋犹陞也。恐颠坠于非义，当如之何也。”郑玄曰：“其，语助也。齐鲁之间声如‘姬’。记曰‘何居’。”

⑲【集解】孔安国曰：“微子，帝乙子，故曰‘王子’。天生紂为乱，是下菑

也。”郑玄曰：“少师不答，志在必死。”【正义】菑音灾。

②【集解】孔安国曰：“上不畏天菑，下不畏贤人，违度耆老之长，不用其教。”

②【集解】徐广曰：“一云‘今殷民侵神柝’，又一云‘陋淫侵神祇’。”案：马融曰“天曰神，地曰祇”。【索隐】陋淫，尚书作“攘窃”。刘氏云“陋淫犹轻秽也”。

箕子者，①纣亲戚也。②纣始为象箸，③箕子叹曰：“彼为象箸，必为玉栝；为栝，则必思远方珍怪之物而御之矣。與马宫室之渐自此始，不可振也。”纣为淫泆，箕子谏，不听。人或曰：“可以去矣。”箕子曰：“为人臣谏不听而去，是彰君之恶而自说于民，吾不忍为也。”乃被发佯狂而为奴。遂隐而鼓琴以自悲，故传之曰箕子操。④

①【集解】马融曰：“箕，国名也。子，爵也。”

②【索隐】箕，国；子，爵也。司马彪曰“箕子名胥餘”。马融、王肃以箕子为纣之诸父。服虔、杜预以为纣之庶兄。杜预云“梁国蒙县有箕子冢”。

③【索隐】箸音持略反。按：下云“为象箸必为玉杯”，杯箸事相近，周礼六尊有牺、象、著、壶、泰、山。著尊者，著地无足是也。刘氏音直虑反，则杯箸亦食用之物，亦并通。

④【集解】风俗通义曰：“其道闭塞忧愁而作者，命其曲曰操。操者，言遇菑遭害，困厄穷迫，虽怨恨失意，犹守礼义，不惧不慑，乐道而不改其操也。”

王子比干者，亦纣之亲戚也。见箕子谏不听而为奴，则曰：“君有过而不以死争，则百姓何辜！”乃直言谏纣。纣怒曰：“吾闻圣人心有七窍，信有诸乎？”乃遂杀王子比干，剖视其心。

微子曰：“父子有骨肉，而臣主以义属。故父有过，子三谏不

听，则随而号之；人臣三谏不听，则其义可以去矣。”于是太师、少师乃劝微子去，遂行。<sup>①</sup>

①【集解】时比干已死，而云少师者似误。

周武王伐纣克殷，微子乃持其祭器造于军门，肉袒面缚，<sup>①</sup>左牵羊，右把茅，膝行而前以告。于是武王乃释微子，复其位如故。

①【索隐】肉袒者，袒而露肉也。面缚者，缚手于背而面向前也。刘氏云“面即背也”，义亦稍迂。

武王封纣子武庚禄父以续殷祀，使管叔、蔡叔傅相之。

武王既克殷，访问箕子。

武王曰：“於乎！维天阴定下民，相和其居，<sup>①</sup>我不知其常伦所序。”<sup>②</sup>

①【集解】孔安国曰：“天不言而默定下民，助合其居，使有常生之资也。”

②【集解】孔安国曰：“言我不知天所以定民之常道理次序，问何由。”

箕子对曰：“在昔鯀陞鸿水，汨陈其五行，<sup>①</sup>帝乃震怒，不从鸿范九等，常伦所斲。<sup>②</sup>鯀则殛死，禹乃嗣兴。<sup>③</sup>天乃锡禹鸿范九等，常伦所序。<sup>④</sup>

①【集解】孔安国曰：“陞，塞；汨，乱也。治水失道，是乱陈五行。”

②【集解】徐广曰：“一作‘释’。”驷案：郑玄曰“帝，天也。天以鯀如是，乃震动其威怒，不与天道大法九类，言王所问所由败也”。

③【集解】郑玄曰：“春秋传曰‘舜之诛也殛鯀，其举也兴禹’。”

④【集解】孔安国曰：“天与禹，洛出书也。神龟负文而出，列于背，有数至于九，禹遂因而第之，以成九类。”

“初一日五行；二曰五事；三曰八政；四曰五纪；五曰皇极；六曰

三德；七曰稽疑；八曰庶征；九曰向用五福，畏用六极。<sup>①</sup>

①【集解】马融曰：“言天所以畏惧人用六极。”

“五行：一曰水，二曰火，三曰木，四曰金，五曰土。<sup>①</sup>水曰润下，火曰炎上，<sup>②</sup>木曰曲直，<sup>③</sup>金曰从革，<sup>④</sup>土曰稼穡。<sup>⑤</sup>润下作咸，<sup>⑥</sup>炎上作苦，<sup>⑦</sup>曲直作酸，<sup>⑧</sup>从革作辛，<sup>⑨</sup>稼穡作甘。<sup>⑩</sup>

①【集解】郑玄曰：“此数本诸阴阳所生之次也。”

②【集解】孔安国曰：“言其自然之常性也。”

③【集解】孔安国曰：“木可揉使曲直也。”

④【集解】马融曰：“金之性从人而更，可销铄。”

⑤【集解】王肃曰：“种之曰稼，敛之曰穡。”

⑥【集解】孔安国曰：“水鹵所生。”

⑦【集解】孔安国曰：“焦气之味。”

⑧【集解】孔安国曰：“木实之性。”

⑨【集解】孔安国曰：“金气之味。”

⑩【集解】孔安国曰：“甘味生于百谷。五行以下，箕子所陈。”

“五事：一曰貌，二曰言，三曰视，四曰听，五曰思。貌曰恭，言曰从，<sup>①</sup>视曰明，听曰聪，思曰睿。<sup>②</sup>恭作肃，从作治，<sup>③</sup>明作智，聪作谋，<sup>④</sup>睿作圣。<sup>⑤</sup>

①【集解】马融曰：“发言当使可从。”

②【集解】马融曰：“睿，通也。”

③【集解】马融曰：“出令而从，所以为治也。”

④【集解】孔安国曰：“所谋必成审也。”马融曰：“上聪则下进其谋。”

⑤【集解】孔安国曰：“于事无不通，谓之圣。”

“八政：一曰食，二曰货，三曰祀，四曰司空，<sup>①</sup>五曰司徒，<sup>②</sup>六曰司寇，<sup>③</sup>七曰宾，<sup>④</sup>八曰师。<sup>⑤</sup>



①【集解】马融曰：“司空，掌营城郭，主空土以居民。”

②【集解】孔安国曰：“主徒众，教以礼义。”

③【集解】马融曰：“主诛寇害。”

④【集解】郑玄曰：“掌诸侯朝覲之官。”

⑤【集解】郑玄曰：“掌军旅之官。”

“五纪：一曰岁，二曰月，三曰日，四曰星辰，<sup>①</sup>五曰历数。<sup>②</sup>

①【集解】马融曰：“星，二十八宿。辰，日月之所会也。”郑玄曰：“星，五星也。”

②【集解】孔安国曰：“历数，节气之度。以为历数，敬授民时。”

“皇极：皇建其有极，<sup>①</sup>敛时五福，用傅锡其庶民，<sup>②</sup>维时其庶民于女极，<sup>③</sup>锡女保极。<sup>④</sup>凡厥庶民，毋有淫朋，人毋有比德，维皇作极。<sup>⑤</sup>凡厥庶民，有猷有为有守，女则念之。<sup>⑥</sup>不协于极，不离于咎，皇则受之。<sup>⑦</sup>而安而色，曰予所好德，女则锡之福。<sup>⑧</sup>时人斯其维皇之极。<sup>⑨</sup>毋侮齔寡而畏高明。<sup>⑩</sup>人之有能有为，使羞其行，而国其昌。<sup>⑪</sup>凡厥正人，既富方穀。<sup>⑫</sup>女不能使有好于而家，时人斯其辜。<sup>⑬</sup>于其毋好，女虽锡之福，其作女用咎。<sup>⑭</sup>毋偏毋颇，遵王之义。<sup>⑮</sup>毋有作好，遵王之道。<sup>⑯</sup>毋有作恶，遵王之路。毋偏毋党，王道荡荡。<sup>⑰</sup>毋党毋偏，王道平平。<sup>⑱</sup>毋反毋侧，王道正直。<sup>⑲</sup>会其有极，<sup>⑳</sup>归其有极。<sup>㉑</sup>曰王极之傅言，<sup>㉒</sup>是夷是训，于帝其顺。<sup>㉓</sup>凡厥庶民，极之傅言，<sup>㉔</sup>是顺是行，<sup>㉕</sup>以近天子之光。<sup>㉖</sup>曰天子作民父母，以为天下王。<sup>㉗</sup>

①【集解】孔安国曰：“太中之道，大立其有中，谓行九畴之义。”

②【集解】马融曰：“当敛是五福之道，用布与众民。”

③【集解】马融曰：“以其能敛是五福，故众民于汝取中正以归心也。”

④【集解】郑玄曰：“又赐女以守中之道。”

- ⑤【集解】孔安国曰：“民有善则无淫过朋党之恶，比周之德，惟天下皆大为中正也。”
- ⑥【集解】马融曰：“凡其众民有谋有为，有所执守，当思念其行有所趣舍也。”
- ⑦【集解】孔安国曰：“凡民之行虽不合于中，而不罹于咎恶，皆可进用大法受之。”
- ⑧【集解】孔安国曰：“女当安女颜色，以谦下人。人曰我所好者德也，女则与之爵禄。”
- ⑨【集解】孔安国曰：“不合于中之人，女与之福，则是人此其惟大之中，言可勉进也。”
- ⑩【集解】马融曰：“高明显宠者，不枉法畏之。”
- ⑪【集解】王肃曰：“使进其行，任之以政，则国为之昌。”
- ⑫【集解】孔安国曰：“正直之人，既当爵禄富之，又当以善道接之。”
- ⑬【集解】孔安国曰：“不能使正人有好于国家，则是人斯其诈取罪而去也。”
- ⑭【集解】郑玄曰：“无好于女家之人，虽锡之以爵禄，其动作为女用恶。谓为天子结怨于民。”
- ⑮【集解】孔安国曰：“偏，不平；颇，不正。言当循先王正义以治民。”
- ⑯【集解】马融曰：“好，私好也。”
- ⑰【集解】孔安国曰：“言开辟也。”郑玄曰：“党，朋党。”
- ⑱【集解】孔安国曰：“言辨治也。”
- ⑲【集解】马融曰：“反，反道也。侧，倾侧也。”
- ⑳【集解】郑玄曰：“谓君也当会聚有中之人以为臣也。”
- ㉑【集解】郑玄曰：“谓臣也当就有中之君而事之。”
- ㉒【集解】马融曰：“王者当尽极行之，使臣下布陈其言。”
- ㉓【集解】马融曰：“是大中而常行之，用是教训天下，于天为顺也。”
- ㉔【集解】马融曰：“亦尽极数陈其言于上也。”

⑳【集解】王肃曰：“民纳言于上而得中者，则顺而行之。”

㉑【集解】王肃曰：“近犹益也。顺行民言，所以益天子之光。”

㉒【集解】王肃曰：“政教务中，民善是用，所以为民父母，而为天下所归往。”

“三德：一曰正直，<sup>①</sup>二曰刚克，三曰柔克。<sup>②</sup>平康正直，<sup>③</sup>强不友刚克，<sup>④</sup>内友柔克，<sup>⑤</sup>沈渐刚克，<sup>⑥</sup>高明柔克。<sup>⑦</sup>维辟作福，维辟作威，维辟玉食。<sup>⑧</sup>臣无有作福作威玉食。臣有作福作威玉食，其害于而家，凶于而国，人用侧颇辟，民用僭忒。<sup>⑨</sup>

①【集解】郑玄曰：“中平之人。”

②【集解】郑玄曰：“克，能也。刚而能柔，柔而能刚，宽猛相济，以成治立功。”

③【集解】孔安国曰：“世平安，用正直治之。”

④【集解】孔安国曰：“友，顺也。世强御不顺，以刚能治之。”

⑤【集解】孔安国曰：“世和顺，以柔能治之也。”【索隐】内，当为“𡗗”。  
𡗗，和也。

⑥【集解】马融曰：“沈，阴也。潜，伏也。阴伏之谋，谓贼臣乱子非一朝一夕之渐，君亲无将，将而诛。”【索隐】尚书作“沈潜”，此作“渐”字，其义当依马注。

⑦【集解】马融曰：“高明君子，亦以德怀也。”

⑧【集解】马融曰：“辟，君也。玉食，美食。不言王者，关诸侯也。”郑玄曰：“作福，专爵赏也。作威，专刑罚也。玉食，备珍美也。”

⑨【集解】孔安国曰：“在位不端平，则下民僭差。”

“稽疑：择建立卜筮人。<sup>①</sup>乃命卜筮，曰雨，曰济，曰涕，<sup>②</sup>曰雾，<sup>③</sup>曰克，曰贞，曰悔，凡七。卜五，占之用二，衍筮。<sup>④</sup>立时人为卜筮，<sup>⑤</sup>三人占则从二人之言。<sup>⑥</sup>女则有大疑，谋及女心，谋及卿士，谋及庶人，谋及卜筮。<sup>⑦</sup>女则从，龟从，筮从，卿士从，庶民从，是之谓大同，<sup>⑧</sup>而身其康强，而子孙其逢吉。<sup>⑨</sup>女则从，龟从，筮从，卿

士逆，庶民逆，吉。卿士从，龟从，筮从，女则逆，庶民逆，吉。庶民从，龟从，筮从，女则逆，卿士逆，吉。<sup>⑩</sup>女则从，龟从，筮逆，卿士逆，庶民逆，作内吉，作外凶。<sup>⑪</sup>龟筮共违于人，用静吉，用作凶。<sup>⑫</sup>

①【集解】孔安国曰：“龟曰卜，著曰筮。考正疑事，当选择知卜筮人而建立之。”

②【集解】尚书作“圉”。【索隐】涕音亦，尚书作“圉”。孔安国云“气駉駉亦连续”。今此文作“涕”，是涕泣亦相连之状也。

③【集解】徐广曰：“一曰‘洩’，曰‘被’。”【索隐】雾音蒙，然“蒙”与“雾”亦通。徐广所见本“涕”作“洩”，“蒙”作“被”，义通而字变。

④【集解】郑玄曰：“卜五占之用，谓雨、济、圉、雾、克也。二衍筮，谓贞、悔也。将立卜筮人，乃先命名兆卦而分别之。兆卦之名凡七，龟用五，易用二。审此道者，乃立之也。雨者，兆之体，气如雨然也。济者，如雨止之云气在上者也。圉者，色泽而光明也。雾者，气不释，都冥冥也。克者，如禊气之色相犯也。内卦曰贞，贞，正也。外卦曰悔，悔之言晦也，晦犹终也。卦象多变，故言‘衍筮’也。”

⑤【集解】郑玄曰：“立是能分别兆卦之名者，以为卜筮人。”

⑥【集解】郑玄曰：“从其多者。著龟之道幽微难明，慎之深。”

⑦【集解】孔安国曰：“先尽谋虑，然后卜筮以决之。”

⑧【集解】孔安国曰：“大同于吉。”

⑨【集解】孔安国曰：“动不违众，故后世遇吉也。”

⑩【集解】郑玄曰：“此三者皆从多，故为吉。”

⑪【集解】郑玄曰：“此逆者多，以故举事于境内则吉，境外则凶。”

⑫【集解】孔安国曰：“安以守常则吉，动则凶。”郑玄曰：“龟筮皆与人谋相违，人虽三从，犹不可以举事。”

“庶征：曰雨，曰阳，曰隰，曰寒，曰风，曰时。<sup>①</sup>五者来备，各以其序，庶草蕃庠。<sup>②</sup>一极备，凶。一极亡，凶。<sup>③</sup>曰休征：<sup>④</sup>曰肃，时雨

若；<sup>⑤</sup>曰治，时暘若；<sup>⑥</sup>曰知，时奥若；<sup>⑦</sup>曰谋，时寒若；<sup>⑧</sup>曰圣，时风若。<sup>⑨</sup>曰咎征；<sup>⑩</sup>曰狂，常雨若；<sup>⑪</sup>曰僭，常暘若；<sup>⑫</sup>曰舒，常奥若；<sup>⑬</sup>曰急，常寒若；<sup>⑭</sup>曰雾，常风若。<sup>⑮</sup>王眚维岁，<sup>⑯</sup>卿士维月，<sup>⑰</sup>师尹维日。<sup>⑱</sup>岁月日时毋易，<sup>⑲</sup>百谷用成，治用明，<sup>⑳</sup>峻民用章，家用平康。<sup>㉑</sup>日月岁时既易，百谷用不成，治用昏不明，峻民用微，家用不宁。庶民维星，<sup>㉒</sup>星有好风，星有好雨。<sup>㉓</sup>日月之行，有冬有夏。<sup>㉔</sup>月之从星，则以风雨。<sup>㉕</sup>

①【集解】孔安国曰：“雨以润物，阳以干物，暖以长物，寒以成物，风以动物。五者各以时，所以为众验。”

②【集解】孔安国曰：“言五者备至，各以次序，则众草木繁茂滋丰也。”

③【集解】孔安国曰：“一者备极过甚则凶，一者极无不至亦凶，谓其不时失叙之谓也。”

④【集解】孔安国曰：“叙美行之验。”

⑤【集解】孔安国曰：“君行敬，则时雨顺之。”

⑥【集解】孔安国曰：“君政治，则时暘顺之。”

⑦【集解】孔安国曰：“君昭哲，则时暖顺之。”

⑧【集解】孔安国曰：“君能谋，则时寒顺之。”

⑨【集解】孔安国曰：“君能通理，则时风顺之。”

⑩【集解】孔安国曰：“叙恶行之验也。”

⑪【集解】孔安国曰：“君行狂妄，则常雨顺之。”

⑫【集解】孔安国曰：“君行僭差，则常暘顺之。”

⑬【集解】孔安国曰：“君臣逸豫，则常暖顺之。” 【索隐】舒，依字读。

按：下有“曰急”也。

⑭【集解】孔安国曰：“君行急，则常寒顺之。”

⑮【集解】孔安国曰：“君行雾暗，则常风顺之。”

⑯【集解】马融曰：“言王者所眚职，如岁兼四时也。”

⑮【集解】孔安国曰：“卿士各有所掌，如月之有别。”

⑯【集解】孔安国曰：“众正官之吏分治其职，如日之有岁月也。”

⑰【集解】孔安国曰：“各顺常。”

⑱【集解】孔安国曰：“岁月无易，则百谷成；君臣无易，则正治明。”

⑲【集解】孔安国曰：“贤臣显用，国家平宁。”

⑳【集解】孔安国曰：“星，民象，故众民惟若星也。”

㉑【集解】马融曰：“箕星好风，毕星好雨。”

㉒【集解】孔安国曰：“日月之行，冬夏各有常度。”

㉓【集解】孔安国曰：“月经于箕则多风，离于毕则多雨。政教失常，以从民欲，亦所以乱。”

“五福：一曰寿，二曰富，三曰康宁，<sup>①</sup>四曰攸好德，<sup>②</sup>五曰考终命。<sup>③</sup>六极：一曰凶短折，<sup>④</sup>二曰疾，三曰忧，四曰贫，五曰恶，<sup>⑤</sup>六曰弱。”<sup>⑥</sup>

①【集解】郑玄曰：“康宁，平安。”

②【集解】孔安国曰：“所好者德，福之道。”

③【集解】孔安国曰：“各成其短长之命以自终，不横夭。”

④【集解】郑玄曰：“未龀曰凶，未冠曰短，未婚曰折。”【索隐】未龀，未毁齿也。音楚悞反。

⑤【集解】孔安国曰：“恶，丑陋也。”

⑥【集解】郑玄曰：“愚懦不壮毅曰弱。”

于是武王乃封箕子于朝鲜<sup>①</sup>而不臣也。

①【索隐】潮仙二音。地因水为名也。

其后箕子朝周，过故殷虚，感宫室毁坏，生禾黍，箕子伤之，欲哭则不可，欲泣为其近妇人，<sup>①</sup>乃作麦秀之诗以歌咏之。其诗曰：“麦秀渐渐兮，禾黍油油。<sup>②</sup>彼狡僮兮，不与我好兮！”所谓狡童者，

纣也。殷民闻之，皆为流涕。<sup>③</sup>

①【索隐】妇人之性多涕泣。

②【索隐】渐渐，麦芒之状，音子廉反，又依字读。油油者，禾黍之苗光悦貌。

③【集解】杜预曰：“梁国蒙县有箕子冢。”

武王崩，成王少，周公旦代行政当国。管、蔡疑之，乃与武庚作乱，欲袭成王、周公。<sup>①</sup>周公既承成王命诛武庚，杀管叔，放蔡叔，乃命微子开代殷后，奉其先祀，作微子之命以申之，国于宋。<sup>②</sup>微子故能仁贤，乃代武庚，故殷之馀民甚戴爱之。

①【集解】徐广曰：“一云‘欲袭成周’。”

②【集解】世本曰：“宋更曰睢阳。”

微子开卒，立其弟衍，是为微仲。<sup>①</sup>微仲卒，子宋公稽立。<sup>②</sup>宋公稽卒，子丁公申立。丁公申卒，子湣公共立。湣公共卒，弟炀公熙立。炀公即位，湣公子鮒祀弑炀公而自立，<sup>③</sup>曰“我当立”，是为厉公。厉公卒，子釐公举立。

①【集解】礼记曰：“微子舍其孙腓而立衍也。”郑玄曰：“微子適子死，立其弟衍，殷礼也。”【索隐】按：家语微子弟仲思名衍，一名泄，嗣微子为宋公。虽迁爵易位，而班级不过其故，故以旧官为称。故二微虽为宋公，犹称微，至于稽乃称宋公也。

②【索隐】谯周云：“未谥，故名之。”

③【集解】徐广曰：“鮒，一作‘鮒’。”【索隐】徐云一本作“鮒”，谯周亦作“鮒祀”，据左氏，即湣公庶子也。弑炀公，欲立太子弗父何，何让不受。

釐公十七年，周厉王出奔彘。

二十八年，釐公卒，子惠公颯立。<sup>①</sup>惠公四年，周宣王即位。三十年，惠公卒，子哀公立。哀公元年卒，子戴公立。

①【集解】吕忱曰：“颯音古莧反。”

戴公二十九年，周幽王为犬戎所杀，秦始列为诸侯。

三十四年，戴公卒，子武公司空立。武公生女为鲁惠公夫人，生鲁桓公。十八年，武公卒，子宣公力立。

宣公有太子与夷。十九年，宣公病，让其弟和，曰：“父死子继，兄死弟及，天下通义也。我其立和。”和亦三让而受之。宣公卒，弟和立，是为穆公。

穆公九年，病，召大司马孔父谓曰：“先君宣公舍太子与夷而立我，我不敢忘。我死，必立与夷也。”孔父曰：“群臣皆愿立公子冯。”穆公曰：“毋立冯，吾不可以负宣公。”于是穆公使冯出居于郑。八月庚辰，穆公卒，兄宣公子与夷立，是为殇公。君子闻之，曰：“宋宣公可谓知人矣，立其弟以成义，然卒其子复享之。”

殇公元年，卫公子州吁弑其君完自立，欲得诸侯，使告于宋曰：“冯在郑，必为乱，可与我伐之。”宋许之，与伐郑，至东门而还。二年，郑伐宋，以报东门之役。其后诸侯数来侵伐。

九年，大司马孔父嘉妻好，出，道遇太宰华督，<sup>①</sup>督说，目而观之。<sup>②</sup>督利孔父妻，乃使人宣言国中曰：“殇公即位十年耳，而十一战，<sup>③</sup>民苦不堪，皆孔父为之，我且杀孔父以宁民。”是岁，鲁弑其君隐公。十年，华督攻杀孔父，取其妻。殇公怒，遂弑殇公，而迎穆公子冯于郑而立之，是为庄公。

①【集解】服虔曰：“戴公之孙。”

②【集解】服虔曰：“目者，极视精不转也。”



③【集解】贾逵曰：“一战，伐郑，围其东门；二战，取其禾；三战，取郟田；四战，郟郑伐宋，入其郟；五战，伐郑，围长葛；六战，郑以王命伐宋；七战，鲁败宋师于菅；八战，宋、卫入郑；九战，伐戴；十战，郑入宋；十一战，郑伯以虢师大败宋。”

庄公元年，华督为相。九年，执郑之祭仲，要以立突为郑君。祭仲许，竟立突。十九年，庄公卒，子湣公捷立。

湣公七年，齐桓公即位。九年，宋水，鲁使臧文仲往吊水。①湣公自罪曰：“寡人以不能事鬼神，政不修，故水。”臧文仲善此言。此言乃公子子鱼教湣公也。

①【集解】贾逵曰：“问凶曰吊。”

十年夏，宋伐鲁，战于乘丘，①鲁生虜宋南宫万。②宋人请万，万归宋。十一年秋，湣公与南宫万猎，因博争行，湣公怒，辱之，曰：“始吾敬若；今若，鲁虜也。”万有力，病此言，遂以局杀湣公于蒙泽。③大夫仇牧闻之，以兵造公门。万搏牧，牧齿著门阖死。④因杀太宰华督，乃更立公子游为君。诸公子奔萧，公子御说奔亳。⑤万弟南宫牛将兵围亳。冬，萧及宋之诸公子共击杀南宫牛，弑宋新君游而立湣公弟御说，是为桓公。宋万奔陈。宋人请以赂陈。陈人使妇人饮之醇酒，⑥以革裹之，归宋。⑦宋人醢万也。⑧

1476

①【集解】徐广曰：“乘，一作‘滕’。”駉案：杜预曰“乘丘，鲁地。”

②【集解】贾逵曰：“南宫，氏；万，名。宋卿。”

③【集解】贾逵曰：“蒙泽，宋泽名也。”杜预曰：“宋地，梁国有蒙县。”

④【集解】何休曰：“阖，门扇。”

⑤【集解】服虔曰：“萧，亳，宋邑也。”杜预曰：“今沛国有萧县，蒙县西北有亳城也。”